

Areglo Aña pa Konmemorashon di Pasado di Sklabitut

E direktiva di fundashon Fonds voor Cultuurparticipatie,

teniendo kuenta ku artíkulo 10, insiso kuater di e Lei di maneho spesífiko di kultura (Wet op het specifiek cultuurbeleid);

teniendo kuenta ku artíkulo 4:23, insiso unu di e Lei general di derecho atministrativo (Algemene wet bestuursrecht);

teniendo kuenta ku e Reglamentu General di Supsidio di Fonds voor Cultuurparticipatie;

ku aprobashon di e minister di Enseñansa, Kultura i Siensia di 16/01/2023;

ta disidí:

Paragraf 1 General

Artíkulo 1.1 Definishonnan

Den e areglo akí ta komprondé bou di:

- a. *Reglamentu General di Supsidio*: Reglamentu General di Supsidio Fonds voor Cultuurparticipatie 2021;
- b. *Reglamentu interno*: e Reglamentu Interno di e Stichting Fonds voor Cultuurparticipatie 2019;
- c. *Fondo*: Stichting Fonds voor Cultuurparticipatie;
- d. *Reino Hulandes*: Hulanda, Aruba, Kòrsou, Sint Maarten i e tres entidatnan públiko: Boneiru, Sint Eustatius i Saba;
- e. *Parti Karibense di Reino*: Aruba, Kòrsou i Sint Maarten i e tres entidatnan públiko: Boneiru, Sint Eustatius i Saba;
- f. *Parti Europeo di Hulanda*: Hulanda, sin e parti Karibense di Reino;
- g. *Komunidat*: desendientenan di esnan ku a keda hasí katibu, e hendenan indígena di e pais i esnan ku a traha bou di kontrakt, ta forma parti inseparabel di e historia akí. Esakinan ta entre otro e hendenan indígena di e kolonianan di e tempu ei Sürnam i e seis islanan karibense, chines, havanes i hindustan trahando bou di kontrakt, i tambe por ehèmpel komunidatnan moluko, ganes i surafrikano. P'esei e eksperensia di komunidatnan no oropeo enbolbí den e pasado di sklabitut ta para sentral den e aktividatnan durante e Aña di Konmemorashon;
- h. *Institushon kultural*: fundashon kultural òf asosiashon sin fin di lukro komersial, ku afan pa partisipashon kultural òf edukashon kultural, establese den Reino Hulandes;
- i. *Institushon den tereno sosial*: un institushon ku personalidat hurídiko sin fin di lukro komersial riba tereno di kuido, bienestar, abilidad di biba, labor, sosten sosial, partisipashon i integrashon, abilidad pa ayudo propio, enseñansa speshal, kuido di hóbennan, kuido di promé liña, kuido di grandinan, GGZ¹, òf tur tareanan relashoná ku esei, bou di kual ta kai maneho ku a keda repartí na munisipionan;
- j. *Profeshonal*: un profeshonal kultural ku eksperensia demostrabel ku ta profeshonalmente aktivo komo empresario independiente riba tereno di partisipashon na kultura, edukashon kultural òf partisipashon na patrimonio i ta inskribí komo tal na Kámara di Komersio òf un organisashon komparabel den e parti karibense di Reino;
- k. *Kreadó di kultura*: un persona di 18 aña òf mas bieu, ku tin un título di estadia legítimo, ku den tempu liber ta tuma parti aktivamente na aktividatnan riba tereno di partisipashon na kultura òf edukashon kultural;

¹ organisashon pa kuido di salú mental.

- l. *Partisipashon na kultura*: práktika aktivo di aktivitatnan artístiko òf aktivitatnan relashoná ku patrimonio den tempu liber;
- m. *Edukashon kultural*: e siñamentu disididu tokante i pa medio di arte i patrimonio paden òf pafó di skol;
- n. *Invershonnán material*: kompra di materialnan pa un proyekto ku e petishonario por sigui usa pa largu tempu despues di e proyekto;
- o. *Sklabitud*: tur forma di trabou involuntario den e èks kolonianan di Reino, inkluso trabou bou di kontrakt.

Artíkulo 1.2 Meta

Ku e areglo akí e Fondo ta stimulá aktivitatnan kultural kaminda e partisipantenan ta enbolbí aktivamente i aktivitatnan kultural edukashonal ku ta kontribuí na konmemorá i selebrá abolishon di sklabilitut den Reino, i tambe ku ta engrandesé e konosementu i e konsientisashon di e pasado di sklabilitut i e efekto kontinu di esei te dia djawe.

Artíkulo 1.3 Ken por hasi petishon

1. E siguiantenan ku ta establese den Reino Hulandes por hasi petishon pa supsidio:
 - a. institushon kultural;
 - b. institushon riba tereno sosial;
 - c. profeshonal, òf
 - d. kreadó di kultura, na nòmber di un grupo di por lo ménos 3 otro kreadónan di kultura, pa kual ta konta ku nan tur tin un funshon den e proyekto.
2. E petishonarianan mensioná den e promé insiso por traha huntu ku otro personanan i organisashonnan, manera organisashonnan kultural, institushonnan di patrimonio òf institushonnan di enseñansa. Tambe esaki por ta un kolaborashon ku un organisashon den eksterior.

Artíkulo 1.4 Pa kiko por hasi petishon

1. Por pidi supsidio pa proyektonan ku ta kontribuí na un òf mas di e siguiente efektonan:
 - a. efekto a: alkansá gruponan nobo di enfoke;
 - b. efekto b: konstruí konekshonnan kontinu òf retnan di komunitatnan;
 - c. efekto c: partisipantenan ta desaroyá perspektivanan múltiple riba pasado di sklabilitut;
 - d. efekto d: partisipantenan ta usa konosementu di sklabilitut komo fuente di; material pa eksperensia kultura;
 - e. efekto e: komunitatnan ta engrandesé nan abilidad pa yuda nan mes;
 - f. efekto f: estímulo di e proseso di sanashon dor di partisipantenan di komunitatnan.
2. Por pidi supsidio pa un proyekto den kategoria 1, 2 òf 3. Pa loke ta trata e kategorianan ta konta ku:
 - a. proyektonan di kategoria 1 ta dirigí riba sikiera un efekto;
 - b. proyektonan di kategoria 2 ta dirigí riba sikiera dos efekto;
 - c. proyektonan di kategoria 3 ta dirigí riba sikiera tres efekto.

3. Pa loke ta trata e posibilidatnan di petishon ta konta ku:
 - a. e institushon kultural, e institushon riba tereno sosial, e profeshonal òf un kreadó di kultura por hasi petishon pa proyektonan di kategoria 1;
 - b. e institushon kultural, e institushon riba tereno sosial, e profeshonal por hasi petishon pa proyektonan di kategoria 2;
 - c. e institushon kultural òf e institushon riba tereno sosial por hasi petishon pa proyektonan di kategoria 3.

4. Un proyekto:
 - a. ku ta kai den kategoria 1 òf kategoria 2 no ta kuminsá promé ku ocho siman despues di a entregá e petishon;
 - b. ku ta kai den kategoria 3, no ta kuminsá promé ku diestres siman despues di a entregá e petishon;
 - c. no ta kuminsá promé ku 1 di yüni 2023 ni despues di 1 di yüli 2024;
 - d. no ta terminá despues di 31 di desèmber 2024.

Artíkulo 1.5. Suma di e supsidio

E suma di e supsidio lo ta pa:

- a. proyektonan di kategoria 1: mínimo € 1.000 i máksimo € 5.000;
- b. proyektonan di kategoria 2: mas ku € 5.000 i ménos ku € 25.000;
- c. proyektonan di kategoria 3: mínimo € 25.000 i máksimo € 50.000.

Artíkulo 1.6 Pago di e supsidio

1. Ta stipulá supsidionan pa proyektonan den kategoria 1 òf kategoria 2 mesora despues di a otorgá e supsidio i lo duná esaki den un biaha.

2. Lo duna supsidio pa proyektonan den kategoria 3 komo vorskòt despues di a otorgá e supsidio. Lo stipulá nan despues di e relato kaminda ta duna kuenta i rason.

Artíkulo 1.7. Montante máksimo di e supsidio

1. E montante máksimo di e supsidio ta € 1.000.000.

2. E Fondo por kambia e montante máksimo di e supsidio. Ta menshoná e tipo di kambionan akí riba e wèpsait di e Fondo.

Artíkulo 1.8 Basenan pa rechaso

1. E Fondo ta rechasá supsidio si:
 - a. a otorgá òf lo bai otorgá supsidio kaba pa mesun aktividatnan:
 - 1° dor di e Fondo;
 - 2° dor di un di e otro fondonan di reino pa kultura;
 - 3° a base di e Areglo riba e maneho kultural spesífiko; òf
 - 4° a base di e Lei di Patrimonio (Erfgoedwet);
 - b. ya kaba na momentu di e petishon ta ehekutando e aktividatnan òf proyektonan pa kual ta hasiendo petishon pa supsidio;
 - c. un kas di publikashon òf emisora di radio i televishon a entregá e petishon;

- d. a deklará e petishonario bankrut òf rasonablemente ta di spera ku esei lo sosodé dentro di poko;
 - e. e petishon no ta pas sufisientemente ku e meta di e areglo; òf
 - f. un persona hurídiko no ta kumpli ku e debernan relashoná ku e Governance Code, manera ta pará den artíkulo 1.10, insiso kuater.
2. E Fondo ta rechasá supsidio na terseronan si nan ta traha riba òrdu di personanan natural òf personanan hurídiko ku no ta bini na remarke pa un supsidio.
 3. E Fondo por rechasá supsidio si e petishonarionan den e aña promé ku e petishon a yega di haña supsidio di e Fondo i e tempu ei no a kumpli ku, òf no kompletamente, ku e debernan di e supsidio.

Artíkulo 1.9 Kondishonnan i limitashonnan

1. Ta duna supsidio solamente si e petishonario muestra ku e rekursonan finansiero disponibel, inkluyendo e supsidio di e Fondo, ta suficiente pa ehekutá e proyekto.
2. Petishonarionan ku ta establese den e parti europeo di Hulanda por haña kubrí pa loke ta trata e gastunan total di e proyekto:
 - a. proyektonan di kategoria 1: máksimo 100%;
 - b. proyektonan di kategoria 2: máksimo 100%;
 - c. proyektonan di kategoria 3: máksimo 90%.
3. Petishonarionan ku ta establese den e parti karibense di Reino por:
 - a. pa loke ta trata e gastunan total di e proyekto, haña kubrí:
 - 1^o proyektonan di kategoria 1: máksimo 100%;
 - 2^o proyektonan di kategoria 2: máksimo 100%;
 - 3^o proyektonan di kategoria 3: máksimo 100%;
 - b. desviando for di artíkulo 4, insiso nuebe, di e Areglo General di Supsidio, buta e gastunan pa kambio di moneda estranhero den nan presupuesto di e petishon pa supsidio.
4. E suma di e supsidio mester ta di proporshon rasonabel ku e aktividatnan pa kua ta hasi e petishon.
5. Solamente gastunan ku tin relashon direkto ku e proyekto por bini na remarke pa supsidio.
6. E pòst pa gastunan inesperá den e presupuesto no por ta mas ku 7% di e gastunan total di e proyekto.
7. Petishonarionan establese na:
 - a. e parti europeo di Hulanda por usa máksimo 10% di e supsidio di e Fondo pa invershonnan material ku ta nesario pa e proyekto.
 - b. e parti karibense di Reino por usa 20% di e supsidio di e Fondo pa invershonnan material ku ta nesario pa e proyekto.

Artíkulo 1.10 Debernan

1. Esun ku ta risibí e supsidio tin e deber di:
 - a. sòru pa e mes i e komunidat konserní ehekutá e aktividatnan subsidiá; i

- b kompartí konosementu di e aktividatnan pa kual a otorgá supsidio, di kual partisipashon na un enkuentro di interkambio organisá pa e Fondo por forma parti.
2. Si e petishonario ta un persona hurídiko, ta konta ku mester apliká e Governance Code Cultuur, e Fair Practice Code i e Code Diversiteit en Inclusie, na un manera ku por lo ménos ta kumpli ku insiso kuater i insiso sinku.
 3. Si e petishonario ta un persona natural ta konta ku mester apliká e Fair Practice Code i e Code Diversiteit en Inclusie, na un manera ku por lo ménos ta kumpli ku insiso sinku.
 4. Pa e Governance Code ta konta ku e petishonario mester muestra kompletamente den e formulario di petishon, a base di e partinan a te ku d akibou:
 - a. kon ta apliká e prinsipionan di e kódigo;
 - b. kon ta sigui e rekomendashonnan ku ta pertenesé na e kódigo;
 - c. ku tin kuestion di un separashon entre supervishon, direktiva i ehekushon, den sentido ku:
 - 1^o si tin kuestion di un modèl di konseho di supervishon: un konseho di supervishon ku ta konsistí di por lo ménos tres miembro;
 - 2^o si tin kuestion di un modèl di direktiva: un direktiva di por lo ménos tres dirigente;
 - d. ku e miembronan di e konseho di supervishon, òf e dirigenten ku tin supervishon no ta forma parti di e presupuesto.
 5. Pa e Fair Practice Code i e Code Diversiteit en Inclusie ta konta ku e petishonario mester splika den e formulario di petishon kon e kódigonan ei ta keda apliká, kaminda e siguiente kategorisashon i e debènan relashoná ku esei ta konta:
 - a. montante pidí te € 5.000: apliká e kódigonan i splika kaminda ku esaki ainda no ta logra kompletamente, si esei ta e kaso;
 - b. montante pidí ta di € 5.000 te ku € 25.000: apliká e kódigonan, splika kaminda ku esaki ainda no ta logra kompletamente i mensioná tambe den e kaso akí e ambishonnan;
 - c. montante pidí ta mas ku € 25.000: apliká e kódigonan, splika kaminda ku esaki ainda no ta logra kompletamente, mensioná den e kaso akí e ambishonnan i reflekshoná riba esaki despues den e relato kaminda ta duna kuenta i rason.

Paragraf 2. E Petishon

Artíkulo 2.1 Términonan di entrega

Por entregá un petishon for di djaluna 16 di yanüari 2023 pa 13:00 ora te ku djáron 1 di mei 2024 pa 17:00 ora.

Artíkulo 2.2 Eksigensianan di entrega

1. Ta entregá petishonnan via di e formulario di petishon digital den e sistema di petishon online Mijn Fonds. Esaki ta aksesibel via di e wèpsait di e Fondo.
2. Pa uso di Mijn Fonds un kuenta di usuario na e Fondo ta rekerí; trahamentu di un kuenta ta dura algun dia.

3. Un petishon ta bai kompañá pa por lo ménos un presupuesto balansá i ora ta trata di:
 - a. kategoria 1: e formulario standart yená;
 - b. kategoria 2: un plan di proyekto di no mas ku sinku página;
 - c. kategoria 3: un plan di proyekto di no mas ku ocho página.
4. Si e petishonario ta:
 - a. un profeshonal, banda di e promé i di dos insiso, un curriculum vitae òf ekstrakto di inskripshon na Kámara di Komersio ta forma parti adishonal riba e petishon; òf
 - b. un kreadó di kultura, ta splika den e petishon kuantu, kua i for di kua komunitat e mes i e kreadónan di kultura lo tuma parti na e proyekto; i e kolaborashon ei ta keda stipulá den e akuerdo di kolaborashon, a base di e malchi preskribí di e Fondo.
5. No ta trata petishonnan ku no ta kompletu, te ora e petishon ta yená sufisientemente. Ta konsiderá e momentu ku a yena e formulario ku informashon adishonal komo e momentu ku a entregá e petishon.

Artíkulo 2.3. Kriterionan di evaluashon

1. Petishonnan pa un subsidio ta keda evaluá a base di e kriterionan:
 - a. kalidat di e kontenido di e proyekto relashoná ku e meta di e areglo;
 - b. kalidat organisatorio.
2. Solamente petishonnan ku ta kumpli ku tur dos kriterionan di evaluashon ta bini na remarke pa subsidio.

Artíkulo 2.4 Evaluá petishonnan

1. Petishonnan ku ta kai den:
 - a. kategoria 1 òf kategoria 2, ta wòrdu evaluá dor di un komishon interno, eksistiendo di trahadónan di e Fondo;
 - b. kategoria 1, por wòrdu spliká verbalmente promé ku e komishon yega na un opinion;
 - c. kategoria 3, ta wòrdu evaluá dor di un komishon eksterno independiente.
2. E Reglamentu Interno ta kontené informashon di e komishonnan di e Fondo.

Artíkulo 2.5 Moda di Evaluashon

Ta trata petishonnan na sekuensia di entrega, kaminda ta trata solamente petishonnan kompletamente yená.

Artíkulo 2.6 Término di desishon

1. Ta evaluá petishonnan pa proyektonan den kategoria 1 i kategoria 2 den ocho siman despues ku a risibí e petishon.
2. Ta evaluá petishonnan pa proyektonan den kategoria 3 den diestres siman despues ku a risibí e petishon.

Paragraf 3. Determinashonnan final

Artíkulo 3.1. Klóusula di duresa

Den kasonan di gran eksepsion, kaminda na ora di traha e areglo akí no a tene kuenta ku ne i ku tin un impakto irasonabel, e direktiva por desviá for di e derechonan i debernan ku ta inkluí den e areglo akí na bienestar di e petishonario.

Artíkulo 3.2 Reglamentu General di Supsidio

Te kaminda ku e areglo akí no ta tene kuenta ku esei, e determinashonnan di e Reglamentu General di Supsidio ta aplikabel. Por haña e reglamentu ei riba e wèpsait di e Fondo.

Artíkulo 3.3 Entrada na vigor i fecha di vensementu

1. E areglo akí ta drenta na vigor entrante e dia despues ku esaki ta publiká den e Korant di Estado (Staatscourant).
2. E areglo akí ta vense entrante 1 di yanüari 2026. Riba proseduranan di opheshon i proseduranan di apelashon ku na e momentu ei no a terminá, e loke a disidí den e areglo aki ta keda aplikabel.

Artíkulo 3.4 Título pa sitashon

Ta sita e areglo akí komo: **Areglo Aña pa Konmemorashon di Pasado di Sklabitut**

E direktiva di Stichting Fonds voor Cultuurparticipatie,
na nòmber di esaki,

H.G.G.M. Verhoeven,
direktor- dirigente

SPLIKASHON

GENERAL

Motibu

Fonds voor Cultuurparticipatie (e Fondo) ta pone un areglo di supsidio pa e Aña pa Konmemorashon di Pasado di Sklabitut. Organisashonnan i kreadónan di kultura por hasi un petishon pa sosten finansiero pa realisá un aktividat.

Na 2020 a entregá un moshon den parlamento. E inisiativa akí a bini di e komunitatnan surnam i karibense na Hulanda, ku a tene kombersashonnan ku Parlamentu (Tweede Kamer) tokante rasismo institushonal. Den e moshon a para ketu na e konsiderashon ku Hulanda komo unu di e últimonan di e paisnan europeo, a abolí sklabitut na 1863 pero a laga kasi tur e personanan ku a keda hasí katibu bou di supervishon di estado te 1873. Ta p'esei pa hopi hende sklabitut a kaba di bèrdat den 1873 numa. E página shinishi akí den e historia hulandes meresé pa para ketu na dje den un forma amplio. Di e manera ei a pidi gobièrnu pa hasi aña 2023 unu di konmemorashon den kual ta rekordá e abolishon berdadero di sklabitut, 150 aña pasá.

Na yùli 2020 a aseptá e moshon den Parlamentu (Tweede Kamer) pa hasi 2023 un aña di konmemorashon.

Gobièrnu di Reino su plan ta pa laga e konmemorashon akí kana di 1 di yùli 2023 te 1 di yùli 2024, ku un evento di apertura i di klousura, den serkania di sosiedat. Ministerio di Enseñansa, Kultura i Siensia (OCW) a pidi Fonds voor Cultuurparticipatie i Mondriaan Fonds pa desaroyá un areglo di supsidio pa esaki. OCW ta duna tur dos fondo e siguiente puntonan di atenshon pa desaroyo di e areglonan akí:

- involví ekspertonan na formamentu di e areglo di supsidio,
- evaluashon kuidadoso i eksperto (independiente).

Serka Mondriaan Fonds e enfoke ta riba aktividatnan kaminda ta risibí hende manera presentashonnan, eksposishonnan i espektákulonan.

E enfoke di e Fondo ta riba partisipashon na kultura i aktividatnan di edukashon kultural, manera un espektákulo di praktikantenan den tempu liber òf desaroyo di un plan di enseñansa.

Ku e aña di konmemorashon Gobièrnu di Reino tin komo meta pa un aña largu duna mas atenshon na un parti importante, i doloroso di nos historia kompartí komo reino na kual te ku resien a duna tiki atenshon: e pasado di sklabitut. E historia akí, ku su hopi perspektivanan, meresé atenshon for di tur partinan di nos sosiedat.

Via di e areglo Aña di Konmemorashon Pasado di Sklabitut Hulandes e Fondo ta stimulá inisiativanan di petishonarionan di komunitatnan konserní pa den e aña di konmemorashon para ketu na e pasado. Esaki nos ta hasi dor di konmemorá e pasado di sklabitut, selebrá e abolishon i sigui engrandesé e konosementu i e konsientisashon di e pasado di sklabitut i e efekto kontinuo di esei te dia djawe. A areglo akí tin komo meta tambe pa engrandesé e konosementu i konsientisashon di e pasado di sklabitut, fortifikashon di e organisashonnan den e komunitatnan konserní, i sostenementu di un ret di komunitatnan den kua ta krea un konekshon duradero.

E Fondo tin un responsabilidat sosial pa ku e komunitatnan pa regla e areglo mas kla i aksesibel posibel. Ta hasi e formulario di petishon, e sistema di petishon i e evaluashon mas aksesibel posibel. Di e manera akí tur hende, personanan/individuonan, esnan independiente i organisashonnan ku no a hasi petishon anteriormente, ta haña un chèns mas grandi posibel pa hasi uso di e posibilidatnan di supsidio.

Kompensashon di gastunan di tradukshon

Pa petishonarionan di e parti karibense di Reino ku no tin hulandes òf ingles komo nan promé lenga lo ta posibel (den kuadro di stimulá e aksesibilidat) pa skirbi nan petishon na papiamentu i papiamento, i laga tradusí esaki promé ku nan entregá e petishon na e Fondo. Esaki nos ta hasi di e siguiente manera:

- Un posibel petishonario (persona òf organisashon) ta hasi petishon pa un kuenta di usuario na e Fondo;
- E posibel petishonario ta hasi un petishon via e-mail pa kubri gastunan di tradukshon i ta añañá e oferta di un traduktor rekonosí;
- E Fondo ta aprobá esaki;
- E petishonario ta laga e traduktor ei tradusí e petishon i e suplementonan;
- E petishonario ta manda e faktura via e-mail pa e Fondo i e Fondo ta kompensá e gastunan na e petishonario.

E Fondo ta bini ku un protokòl temporal pa por hasi e pagonan promé ku eventualmente honra petishon pa supsidio.

ARTIKULO PA ARTIKULO

Artíkulo 1.1.

parti k

Ta usa e término kreadó di kultura na diferente manera. Ku esaki e Fondo ke men personanan ku den nan tempu liber ta baila, pinta, hasi obranan teatral, traha músika den kua forma ku ta, skirbi poesia, ta práktika arte di palabra, etcetera. Ke men den kuadro di e areglo akí kreadónan profeshonal no ta kreadónan di kultura.

Artíkulo 1.2 Meta

E konosementu tokante e pasado di sklabilitut inkluyendo trabou bou di kontrakt ta chikitu. Esaki ta konta pa tantu Hulanda den su totalidat, komo pa e komunitatnan di desendientenan. Sinembargo e pasado di sklabilitut ta sigui tin efekto te dia djawe. E efekto kontinuo di esei te dia djawe ta mustra e konekshon entre e pasado di sklabilitut, rasismo i falta di komprension den presente. For di e sektor di kultura i komunitatnan tin diferente nesesidat rondó di pasado di sklabilitut i presente. Pa medio di diferente aktividatnan, enseñansa, proyektonan di partisipashon i investigashon por engrandesé e konsientisashon tokante e pasado di sklabilitut. Ku tempu (largu) esei por ta di balor pa komunitatnan i e konosementu i konsientisashon ta di bienestar pa henter e sosiedat i e sentido di e historia komun di e sosiedat.

Artíkulo 1.3 Ken por hasi petishon

E kondishon pa e proyektonan ku lo keda sostené ta ku e komunitat (òf komunitatnan) mes ta e petishonario òf ku nan tin algu di bisa riba (e plan, organisashon, i e ehekushon di) e proyekto.

Ke men e 'mando' riba e ehekushon ta serka e komunitatnan. Banda di esei e petishonario por kolaborá tambe ku por ehèmpel organisashonnan kultural, institushonnan di patrimonio òf institushonnan di enseñansa. Esaki por ta un kolaborashon tambe ku un organisashon den eksterior den forma di por ehèmpel enkuentronan online, via un relato òf dor di kompartí i apliká formanan di kolaborashon entre e diferente organisashonnan. Un funshon manera ta referí na dje den parti d di e

promé insiso, por ta por ehèmpel: koreógrafo, direkto di esena, kordinadó di relashonnan públiko, spesialisista di medionan sosial, mèneder di komunidad, kordinadó finansiero.

Artíkulo 1.4 Pa kiko por hasi petishon

Petishonarionan por hasi petishon pa proyektonan kaminda ku a lo ménos ta ehekutá e kantidat di efektonan obligatorio i opshonalmente mas efektonan. Mas tantu efektonan bo alkansá, mas tantu subsidio bo por pidi. Esaki por enserá entre otro ku ta traha na konekshon entre gruponan sosial, ‘sustainable development goals’², òf otro kasonan mundial mas amplio – te asina leu ku esakinan tin un relashon ku e meta di e areglo.

Promé insiso

parti a

alkansá gruponan nobo di enfoke

Bo komunidad ta konsistí di personanan òf gruponan di enfoke ku ta konosí pa bo. Na e efekto akí bo ta traha aktivamente na alkansá (grupo di) hendenan nobo, pafó di e grupo di enfoke ku bo konosé òf pafó di bo sirkulo di konosinan. Konta nos kon bo ta bai hasi esei i ken lo partisipá aktivamente na bo proyekto. Esaki por tin relashon ku efekto b si bo alkansá otro komunidadnan òf retnan ku bo proyekto.

parti b

konstruí konekshonnan kontinuo òf retnan di komunidadnan

Komunidadnan tei den tur sorto di forma i grado. Interakshon entre komunidadnan i e importansia di esaki rondó di e pasado di sklabilitut ta para sentral den e efekto akí. Kuantanan i konosementu for di un otro komunidad i generashon por enrikesé un komunidad en kuestion. Konta nos kon bo ta bai krea, stimulá i fortifiká un konekshon duradero òf un ret di diferente komunidadnan ku tin un relashon ku e pasado di sklabilitut. Esaki por tin relashon ku efekto a si bo ke alkansá gruponan nobo di enfoke den bo komunidad.

parti c

partisipantenan ta desaroyá perspektivanan múltiple riba pasado di sklabilitut

No ta tur hende tin e mesun manera di mira e mesun eventonan di pasado òf presente. Bo orígen, kon bo a lanta, bo medio ambiente, normanan i balornan ta disidí kon bo ta mira kosnan. Dor di siña konosé otro perspektivanan e manera ku bo ta mira e eventonan ei ta wòrdu ampliá i esaki ta forma mas kompreshon pa tur hende su vishon i opinion. Konta nos kon bo ta bai traha riba kompartí e perspektivanan ei, engrandesé kompreshon i pa kua partisipantenan esei ta relevante.

parti d

partisipantenan ta usa konosementu di sklabilitut komo fuente di material pa eksperensiá kultura

Imágennan históriko, potrètnan aktual ku deskripsion tokante kon e pasado di sklabilitut ta visibel ainda, literatura sientífiko i konosementu di e pasado di sklabilitut ta nesesarario. Konta nos kon bo ta bai prosesá

² Metanan pa desaroyo duradero

e konosementu ei pa eksperensia kultura. Pensa den e kaso aki riba por ehèmpel un presentashon di teater di música ku sosten di profeshonalnan, den kual ta mustra e karakter sosial i e impakto di e pasado di sklabilitut i e presente.

parti e

komunidatnan ta engrandesé nan abilidad pa yuda nan mes

Ku e areglo aki nos ke sostené komunidatnan pa nan bai dilanti riba nan mes forsa, pa nan bira mas outosuficiente i pa di e manera ei nan karga nan mes responsabilidad pa kresementu – ku e meta ku komunidatnan ta wòrdu fortifiká i ku nan por dirigí nan mes (ainda mas) riba ‘empowerment’³. Konta nos kon bo ta bai traha riba e abilidad di bo komunidat pa yuda su mes i kiko bo mester pa esei.

parti f

estímulo di e proseso di sanashon dor di partisipantenan di komunidatnan

Na ora di sanashon ta papia di un lag mas abou ku ta spiritual i un lag di reparashon. Kiko e ta hasi ku e kurpa na momentu ku hasi investigashon riba bo mes antepasadonan? Òf ki konsekuensianan e tin ora ku duna enseñansa na e desendientenan tokante un tema i den un idioma ku ta pará leu for di e historia i e patrimonio di e desendientenan aki? Kiko tin mester pa por sana di e pasado doloroso aki? Konta nos ki tipo di aktividatnan bo ta bai organisá i kon bo ta bai kontribuí na fasilidatnan di maneranan pa kontribuí ku e proseso si sanashon.

Artíkulo 1.7 Montante máksimo di e subsidio

Ta trata petishonnan na sekuensia di entrega. Por ehèmpel: si nos haña hopi petishonnan pa subsidio, e montante disponibel kisas lo kaba mas promé ku 1 di mei 2024. E montante máksimo di subsidio ta wòrdu surpasá. Kada petishon ku entregá despues di esei, nos tin ku rechasá, te asta si e petishonarionan kumpli ku tur eksigensianan. Den e ehèmpel aki esaki ke men ku for di e fecha ei te ku 1 di mei 2024 nos no ta trata petishonnan pa subsidio mas.

Artíkulo 1.8 Basenan pa rechazo

Esaki ta nifiká ku nos ta rechasá subsidio si bo ta hañando subsidio kaba di un otro Fondo di Kultura di Reino (Rijkcultuurfonds) pa e mesun aktividatnan, òf a base di e Areglo di maneho spesífiko di kultura (Regeling op het specifiek cultuurbeleid) (e asina yamá: ‘Subsidio di infrastruktura básiko’ (‘Basisinfrastructuur (BIS)-subsidie’)) òf e Lei di Patrimonio (Erfgoedwet). No ta tur subsidio di un otro Fondo di Kultura di Reino (òf e Ministerio di Enseñansa, Kultura i Siensia) pa definishon ta ekskluí subsidio di nos: esei ta pasa solamente si ta trata di ‘mesun aktividatnan’. Si rasonablemente por hasi un distinshon entre diferente aktividatnan den un proyekto, e ora ei si nos por otorgá subsidio. E pregunta klave e ora ei ta, si tin un distinshon entre e aktividatnan pa kual e subsidio ta wòrdu usá. Na e manera ei un por konsiderá un proyekto (grandi) si diferente aktividatnan ku kada un ku su mes karakter, kaminda ku un aktividat ta por ehèmpel fiha su mes riba arte profeshonal di riba tarima, i un otro riba teater amatùr pa i dor di habitantenan di un sierto bario. Si tin duda, abo komo petishonario e ora ei mester demonstrá kua situashon ta trata di dje. Despues nos ta evaluá si bo a mustra esei sufisientemente. Na e momentu aki e otro Fondonan di Kultura di Reino (Rijkcultuurfondsen) ta:

³ empoderashon

Fonds Podiumkunsten, Stimuleringsfonds Creatieve Industrie, Mondriaanfonds, Nederlands Filmfonds i Nederlands Letterenfonds.

Artíkulo 1.9 Kondishonnan i limitashonnan

Promé te ku di kuater insiso

Solamente proyektonan ku ta relevante na e meta di e areglo akí ta bini na remarke pa supsidio. Na esei ta pertenesé solamente e invershonnan ku ta dirigí direktamente riba e realisashon di e proyekto, manera e kontratashon di personal artístiko i organisatorio i e hürmentu di un espasio pa ensayo òf fasilidatnan di esenario pa realisá e aktividatnan di e proyekto. Gastunan ku di un òf otro manera ta pertenesé na e gastunan normal di eksplotashon, no ta bini na remarke pa sosten. Por pensa riba gastunan fiho di hür, kompra di inventario i invershonnan ku no ta dirigí direktamente riba e realisashon di e aktividatnan.

Nos ta evaluá e petishon a base di e plan total i e presupuesto total. Ke men nos no ta wak solamente e parti kaminda lo bai gasta e supsidio. Por ehèmpel: si e proyekto total ta kosta € 10.000 i e petishonario pidi supsidio di € 5.000 pa gasta na ehekushon di tayernan, e ora ei nos no ta evaluá solamente e tayernan pero tambe e plan total di e proyekto i e presupuesto total.

Di sinku te ku di shete insiso

Por usa máksimo 10% di e supsidio di e Fondo pa invershonnan material ku ta nesesario pa e proyekto. Eseinan ta invershonnan den produktonan ku tin un tempu di uso mas largu ku e periodo di e proyekto, manera aparatonan i instrumentonan manera laptop, kámaranan, proyèktòrnan di video i mashinnan di kose. Banda di esei nos ta distinguí gastunan material, ku por pone den e presupuesto: gastunan di materialnan ku ta nesesario pa e produktonan final òf ku ta bini bek den e produktonan final, manera kosnan nesesario pa fèrf, ròl di felm, papel pa potrèt i artíkulonnan nesesario pa kosementu. En prinsipio no ta sobra nada di e materialnan akí despues di final di e periodo di e proyekto. Software ku spesífikamente ta nesesario pa e proyekto tambe ta kai bou di gastunan di material. Den e kaso aki e petishonario di mes ta tene kuenta ku un proporshon adekuá entre e gastunan pa guia i pa materialnan. Bo ta duda bou di kiko algu ta kai? E ora ei tuma kontakto ku nos.

Institushonnan di e parti karibense di Reino por pidi te 20% di e presupuesto pa invershonnan material, pasobra mirando e infrastruktura lokal i e medionan disponibel tin ora ta nesesario pa nan invertí mas pa por kuminsá un proyekto.

E eskoho pa un porsentahe di supsidio relativamente haltu tabata inspirá pa motibu di e echo ku tin un tempu kòrtiku entre e apertura di e areglo i e komienso di e Aña di Konmemorashon. Ku esei tin relativamente tiki tempu pa realisá finansiamentu adishonal. Asina 'ki nos ta hasi mas fásil pa petishonarionan por kuminsá proyektonan.

Pa e petishonarionan den e parti karibense di Reino; Kòrsou, Aruba, Boneiru, Sint Eustatius, Sint Maarten i Saba hopi biaha ta mas difísil pa haña finansiamentu adishonal. Ta p'esei petishonnan den tur kategoria lo wòrdu kubrí 100%.

Petishonarionan den e parti karibense di Reino por haña nan konfrontá ku gastunan mará na kambio di moneda estranhero. Ku e determinashon akí ta kita e (posibel) drèmpel ei pa petishon di un supsidio. Pa esei a skohe pa sirbi tur petishonario mas igual ku ta posibel. Por haña mas informashon tokante esaki riba nos wèpsait òf dor di tuma kontakto direkto ku un konsehero di e areglo akí.

Artíkulo 1.10 Debernan

Promé insiso

Pa tin bista riba e ganashinan i e efektonan di e areglo i pa kompartí esakinan na un forma mas amplio, e Fondo por organisá enkuentronan kaminda kreadónan di kultura ta kompartí nan konosementu i eksperensianan di e proyektonan ku otro i ku e Fondo. Via kanalnan online tambe ta duna espasio pa presentá kuantanan i imágennan di proyektonan i di kreadónan di kultura.

Di dos te ku di sinku insiso

Kódigonan

E Fondo ta mara balor na un posishon (ekonómiko) fuerte di e sektor di kultura i un área di trabou diverso i inklusivo. Ta p'esei nos ta pidi tur petishonario pa apliká e kódigonan ku ta na vigor den e sektor akí. Riba nos wèpsait (www.cultuurparticipatie.nl/codes) bo por lesa mas tokante e tres kódigonan kultural.

E *Fair Practice Code (FP)*. Den e maneho aktual di kultura e minister di OCW ta enfoká riba fortifikashon di e posishon ekonómiko di e sektor kultural i di kreadónan. E *Fair Practice Code* ta un garantia importante ku e sektor ta paga su trahadónan i personal independiente na un manera rasonabel. Riba e wèpsait www.fairpracticecode.nl bo por lesa mas tokante esaki.

E *Code Diversiteit & Inclusie (D&I)*. E kódigo akí ta ofresé e sektor kultural i kreativo e palankanan pa promové diversidat i inklushon. Riba www.codedi.nl bo por lesa mas tokante e kódigo di komportashon akí. Ei riba tambe bo ta haña material ku ta inspirá: koleganan di e sektor ta splika kon nan ta apliká e kódigo pa nan mes traha na un organisashon den kual diversidat i inklushon ta algu mas ku evidente.

E *Governance Code Cultuur (GC)*. Transparensia i bon gobernashon ta para sentral den e kódigo akí. Ku esei nos ta traha huntu na un sektor kultural íntegro. Un kondishon pa por haña supsidio di e Fondo ta aplikashon di e prinsipionan den e kódigo di komportashon akí. Bo por lesa mas informashon tokante e kódigo akí riba www.cultuur-ondernemen.nl/governance.

Ta elaborá riba e kódigonan di e siguiente manera:

FP

Den kuadro di *fair practice* nos ta curioso kon e petishonarianan ta kontribuí na un organisashon honesto i spesífikamente kon nan ke duna rekompensanan honesto.

D&I

Motivá komo petishonario for di bo mes proyekto kon bo ke i por kontribuí na diversidat i inklushon den e tereno, un organisashon honesto i bon gobernashon di organisashonnan kultural. Diversidat i inklushon den e konteksto di e areglo por tin di aber ku e contenido di e proposishon, e tim, e kreadónan enbolbí, e partnernan i e públiko. Bou di diversidat por komprondé diversidat kultural, pero tambe por ehèmpel diversifikashon den region òf enbolbí aktivamente hendenan ku diferente nivelnan di estudio, edatnan, òf hendenan ku un limitashon. Loke ta krusial ta ku e ta kontribuí na un sektor den kual tin mas bos.

GC

Al final, den kuadro di *governance*, e siguransa di supervishon i e separashon di interesnan entre supervisornan (manera miembronan di direktiva i miembronan di konseho di supervishon) i ehekutivonan ta un prinsipio importante i obligatorio. Por elaborá e prinsipio ei mas o ménos na 2 manera:

- I. Di un banda por skohe pa un konseho di supervishon (yamá tambe: konseho di komisarionan). E direktiva e ora ei tin e mando diario riba e negoshi, kaminda un konseho separá ta mantené supervishon riba e direktiva ei.
- II. Di otro banda por skohe pa un modelo di dirigente kual ta monístiko. Un institushon tin e ora ei un direktiva den kual e gerensia i tambe e supervisornan ta sinta, kaminda via statuto a hasi un distinshon klaro entre dirigentenan ehekutivo i dirigentenan ku no ta ehekutivo.

No opstante e eskoho pa opshon 1 òf 2, semper ta di importansia ku den e statutonan, òf e inskripsjon na e kámara di komersio, ta klaro (dependiendo di e eskoho) ken ta e supervisornan òf e dirigentenan ku no ta ehekutivo. Pasobra nan no por hasi trabounan pagá den e proyekto.

Bo por semper tuma kontakto ku un konsehero di e Fondo pa hasi pregunta i pa deliberashon tokante e uso di kódigonan.

Paragraf 2: E petishon

Artíkulo 2.1 Términonan di entrega

E areglo di supsidio ta habrí pa petishonnan for di djaluna 16 di yanüari 2023 pa 13:00 ora te ku djáron 1 di mei 2024 pa 17:00 ora. E orario stipulá ta e ora manera esei ta konta den e parti europeo di Hulanda. Nos no ta trata petishonnan ku entregá pafó di e términonan. Ku e último fecha pa hasi entrega akí proyektonan por kuminsá ainda riba 1 di yüli 2024, e final di a Aña di Konmemorashon. Pasobra e aktividatnan por sigui te 31 di desèmber 2024 un proyekto por tin e ora ei un periodo di durashon di 6 luna.

Artíkulo 2.2 Eksigensianan di entrega

Promé i di dos insiso

Promé ku bo por entregá un petishon, bo mester tin un kuenta di usuario di bo mes serka e Fondo. Wak riba nos wèpsait kon pa pidi esei. Ta dura algun dia promé ku nos por duna un kuenta di usuario. Nos no por duna un término fiho pa esaki, pero di tur manera tene kuenta ku shete dia di trabou. Ta te ora ku bo haña bo kuenta di usuario, bo por yena e formulario di petishon digital i upload e suplementonan ku ta pertenesé na e petishon. Paga tinu: pidi bo kuenta di usuario na tempu, pa asina nos por trata bo petishon (i no te algun dia promé ku e fecha final di e areglo).

Por kaba yena petishonnan ku no ta kompletu den un término rasonabel. Generalmente esaki ta un término di dos siman, a lo ménos ku e fecha di klousura ta kuminsá den e término di e dos simannan ei. E fecha riba kual a yena e formulario ku informashon adishonal ta konta komo fecha di entrega.

E petishon pa supsidio ta konsistí di e siguiente dokumentonan:

Kategoria 1: Kreadónan di kultura, profeshonalnan independiente i organisashonnan

1. Un formulario di petishon digital kompletamente yená;
2. Un formulario ku e Fondo ta pone disponibel ku preguntanan pa remplasá un plan di proyekto;
3. Un presupuesto (malchi) kompletamente yená;
4. Un akuerdo di kolaborashon (malchi) firmá pa e grupo di kreadónan di kultura.

Kategoria 2: Profeshonalnan independiente i organisashonnan

1. Un formulario di petishon digital kompletamente yená;
2. Un plan di proyekto di no mas ku 5 página;
3. Un presupuesto (malchi) kompletamente yená.

Kategoria 3: Organisashonnan

1. Un formulario di petishon digital kompletamente yená;
2. Un plan di proyekto di no mas ku 8 página;
3. Un presupuesto (malchi) kompletamente yená.

Plan di proyekto:

Banda di e formulario di petishon, petishonnan mester kontené un plan di proyekto pa bini na remarke pa e supsidio akí. E plan di proyekto ta kontené un planifikashon di e durashon kompletu di e proyekto i un presupuesto balansá.

Usa pa un kategoria 1 e 'formulario plan di proyekto' riba e wèpsait di e Fondo pa remplasá bo mes plan di proyekto.

Kontenido, manera di traha i kolaborashon

- Deskribí e kontenido, formamentu i ehekushon di e proyekto i na ki manera esaki ta nobo, distintivo òf inusual kompará ku otro projektonan òf aktividatnan pa e komunidad.
- Deskribí dikun e realisashon di e proyekto akí ta di importansia pa e komunidad.
- Deskribí kon e proyekto ta konektá ku e meta di e areglo.
- Deskribí e kolaborashon i e partishon di ròl i tarea den e grupo i splika kon ta parti e responsabilidat pa e proyekto.

Tin algun kondishonnan mará na hasi petishon komo kreadó di kultura. E petishon mester tin un efekto riba diferente partisipante. Por ehèmpel: un kreadó di kultura e ora ei for di e komunidad mester ta konektá na un mínimo di tres otro kreadó di kultura kende tur lo tin un funshon den e tim di proyekto. Den e petishon mester ta deskribí kuantu, kua kreadónan di kultura i for di kua komunidad nan lo partisipá na e proyekto.

Di kuater insiso

Parti b

Den kaso di un petishon di un kreadó di kultura un akuerdo di kolaborashon firmá pa e gruponan di kreadónan di kultura konserní ta un parti obligatorio di e petishon.

Den e akuerdo di kolaborashon e partidonan ta registrá na intenshonnan kolektivo, bou di kual:

- kiko ta e título di e proyekto;
- ken ta e persona di kontakto prinsipal pa e Fondo;
- e durashon, e komienso i e final di e akuerdo;
- e meta di e akuerdo;
- un deskripsjon di e personanan ku ta enbolbí na e proyekto a base di nòmber, adrès i lugá di biba.

Tin algun eksigensia mará na e otorgamentu di supsidio. Den e kaso akí ta nesesario pa yena un akuerdo di kolaborashon ku ta kontené e informashonnan personal. Solamente di e manera akí ta posibel pa konektá un verifikashon na e informashon ku e kreadó di kultura ta entregá na nòmber di e grupo di kreadónan di kultura.

E akuerdo ta firma pa e kreadónan di kultura konserní di e grupo.

Pa mostra klaridat di e grupo e petishonario ta obligá pa usa e malchi di e akuerdo di kolaborashon di e Fondo (dor di yena esei). Por haña e malchi ei riba e wèpsait di e Fondo.

Artíkulo 2.3 Kriterionan di evaluashon

Ta evaluá petishonnan pa un supsidio a base di e kriterionan menshoná aki bou. E petishonario ta konta klaramente den e petishon kon e ta bai kumpli ku e kriterionan ei.

- Kalidat di e kontenido di e proyekto relashoná ku e meta di e areglo:

Ku e kriterio akí e Fondo ta evaluá si e kontenido i e manera ku lo ehikutá e proyekto ta kontribuí na e meta di e areglo i kiko ta e ambishonnan den e kontenido i e ambishonnan edukativo i e espektativanan. Banda di esei e Fondo ta evaluá te kon leu e aktivitatnan ta kontribuí na logro di e efekto obligatorio òf un òf mas efektonan skohé. Tambe nos ta tèst si e plan ta realístiko i si ku esaki por realisá e ambishonnan i ekspektativanan di e petishonario. E aktivitatnan ta pas den e tres puntonan di salida di e areglo: selebrá, konmemorá i konsientisashon.

Na e kriterio akí e Fondo ta evaluá tambe si e kontenido i e manera ku lo ehikutá e proyekto ta kontribuí na e meta di e areglo i kiko ta e ambishonnan den e kontenido i e ambishonnan edukativo i e espektativanan. Banda di esei e Fondo ta evaluá te kon leu e aktivitatnan ta kontribuí na logro di e efekto obligatorio òf un òf mas efektonan skohé. Tambe nos ta tèst si e plan ta realístiko i si ku esaki por realisá e ambishonnan i ekspektativanan di e petishonario. E aspirashon di e aktivitatnan ta impakto struktural riba un di e tres metanan òf konekshon duradero/forma retnan;

- **Kalidat organisatorio**

Den e kriterio akí ta evaluá si tin kuestion di un plan di proyekto ku ta konektá ku e meta i e aktivitatnan. Den e kaso akí nos ta evaluá entre otro e organisashon di e proyekto i e manera di kolaborashon. Tambe nos ta evaluá si e plan di proyekto ta klaro, konkreto i realístiko, inkluso si tin un planifikashon alkansabel i si e partishon di ròl i tarea di tur hende ku ta traha huntu na e proyekto ta deskribí klaramente. Banda di esei nos ta evaluá tambe si e presupuesto ta komprensibel, rasonabel i realístiko.

Un parti tambe di e kriterio kalidat organisatorio ta un tèst di e embolbimentu di un komunidad komo petishonario òf komo grupo konserní na e organisashon i ehekushon di e proyekto. Den e kaso akí nos ta wak:

- e petishonario ta un representashon di un òf mas komunidad;
- a establesé e aktivitatnan dor di òf ku representantenan di e komunidadnan konserní;
- e bos di e komunidad den e proyekto ta kla i demostrabel?

Solamente petishonnan ku ta kumpli ku tur dos kriterionan di evaluashon por bini na remarke pa supsidio.

Artíkulo 2.4 Evaluá petishonnan

Fonds voor Cultuurparticipatie ta aspirá pa forma un komishon di evaluashon representativo, ku tin mas tantu konosementu posibel di e tema pasado di sklabitut i di e komunidadnan konserní.

E splikashon verbal (promé insiso, parti b) ta pa duna e petishonario e oportunidat pa verbalmente splika e petishon entregá den un kombersashon ku e komishon di konseho. Esaki lo tuma lugá via di un konekshon online. E petishonario(nan) ta presentá su mes i e Fondo òf e komishon ta hasi preguntanan adishonal tokante e petishon. For di kombersashon por sali na kla tambe e balor agregá di e kolaborashon entre e guiadónan, partnernan i kreadónan di kultura deseá.

Artíkulo 2.5 Moda di Evaluashon

Ta trata petishonnan si nan a drenta na tempu i si nan ta kompletu. Ke men no ta kompará nan ku otro promé ku e Fondo yega na un opinion.

Artíkulo 2.6 Término di desishon

Pa loke ta trata e promé dos kategorianan nos tin un término di desishon mas lihé ku e diestres simannan (ku ta konta generalmente pa petishonnan pa subsidio). Nos ta hasi esaki pa por kapasidá e petishonario di por kuminsá mas lihé posibel ku e proyekto.

Paragraf 3 Determinashon final

Artíkulo 3.2 Reglamentu General di Subsidio

E Reglamentu General di Subsidio ta kontené, entre otro, determinashon general, relashoná ku hasimentu di un opheshon, e frekuensia di pago di vorskòt, i e eksigensianan general relashoná ku otorgamentu di subsidio i stipulashon di subsidio. Asina leu ku e areglo aki no ta tene kuenta ku esei, e determinashon di e Reglamentu General di Subsidio ta aplikabel. Por haña e reglamentu ei riba e wèpsait di e Fondo.

Artíkulo 3.3 Entrada na vigor i fecha di vensementu

E momentu ku un areglo ta drenta na vigor no tur ora ta meskos ku e momentu riba kual por entregá e petishonnan. Por haña e términonan di entrega den artíkulo 2.1.

E direktiva di fundashon Fonds voor Cultuurparticipatie,
na nòmber di esaki,

H.G.G.M. Verhoeven,
direktor- dirigente